

關愛的故事



單親母勇迎新生

我叫 Jenny，嫁咗個香港人，本來同丈夫住喺深圳，仲有一個女，前年同佢嗌咗場大交之後，佢竟然提出離婚，留低 2 千幾蚊就走咗。

當時，我真係「兩頭唔到岸」，我攤咗香港身分證，無咗內地嘅戶籍，但我喺香港又無人無物。眼見身上嘅錢用得七七八八，又欠落兩個月房租，而且仲有咗 8 個月身己，我真係唔知點算好，仲諗過死咗算數。

好在我遇到個跨境支援計劃嘅社工，佢安慰我，幫我申請緊急援助基金應付生活所需，喺上水搵到間屋同埋教會轉贈嘅家具俾我，我先至無咁徬徨。

點知後來我發現原來丈夫已經識咗第二個，我真係受唔住呢個打擊。社工送咗我入醫院，連飯都無食，陪我陪到夜晚 9 點幾，仲幫我預備好日用品至走。知道有人咁關心自己，又諗起只有兩歲大嘅女，於是我決定唔理條路幾艱難，都要好好生存落去。

舊年年初，我順利生咗個仔，而家已經漸漸適應香港嘅生活，有時間，仲去社區中心上堂、參加活動同做義工，探吓啲獨居長者，我好開心，因為可以幫到人之外，亦令我覺得自己好有用，回復自信。

我相信有好多新移民家庭同我一樣，面對好多困難，不過，只要勇敢面對，任何難關都會捱過，我希望有家庭問題嘅人士，要主動搵人傾訴，而且要及早尋求其他人嘅協助，避免家庭發生悲劇。

(497 字)